

Monica Kock a tuma su retiro como lider di MPA

AYERA mainta lider di MPA, Monica Kock, a yama un conferencia di prensa na su oficina di abogado. El a indica cu durante ultimo conferencia di prensa cu e tabatin el a bisa cu e mester tuma tempo pa reflexiona riba e resultado di eleccion y kico a sali for di dje. Durante e tempo ey el a dedica tempo na su oficina di abogado y tambe na su dos yiunan. Naturalmente el a analiza e situacion y asina el a tuma e decision cu el lo retira como lider di MPA.

El a informa e partido y tur e candidatonan di e partido riba su decision durante un reunion. E decision pa retira, segun Monica Kock ta splica, a bin mas tanto debi cu na cierto momento den bida e tin un opcion y den esaki el a dicidi cu e kier dedica mas tempo na su famia y concentra mas riba abogacia. Asina despues di a pensa hopi riba dje, sabiendo kico e resultado lo por ta pa e partido, el a dicidi pa retira como lider di MPA.

Kock ta sigui splica cu su retiro no ta significa cu e partido a termina, aunke hopi hende tabata wak'e como e per-

sona cu mas ta profila pa e partido, toch e grupo di e partido ta analizando con nan lo sigui bay como partido.

Monica Kock y demas miembro di partido ta sigui kere den loke MPA ta para pe, e ta bisa cu MPA tin un plan tremendo, mas extenso cu cualkier otro partido y cu ta cla caba.

Tambe Monica Kock a bisa cu e ta orguyoso di e trabou cu el a haci como politico den e tres eleccionnan cu el a participa y den su 4 año como parlamentario. Igualmente el a menciona cu como partido di 1 asiento den oposicion toch a logra (dor di dje mes) hopi cos. "Mi persona toch a logra diferente cos den e parti ey. E leynan cu mi ta sigur cu nan lo sigui cana nan caminda di e parti ey".

Continuando, Kock a bisa cu e feed back cu e ta haya bek for di hendenan pa cu MPA como partido ta cu hopi hende a realiza cu MPA a core un campaña completamente diferente cu e otro partidonan.

Bolbiendo riba su decision di retira como lider, Monica Kock a bisa cu esaki

ta un decision personal. El a analiza e posibilidadnan di uni na otro partido, pero e decision cu el a tuma ta uno personal, pa e mes, e no ta un decision como politico. E decision di eleccion a hunga un rol riba e decision aki, pasobra durante campaña ainda su prioridad tabata e partido y e vision di e partido. Si e resultado lo tabata diferente el lo a sigui bay riba e caminda cu e tabata bezig cune, pero tin biaha den bida cosnan ta pasa pa cual un persona no ta prepara, ta yega na un cruzada y esaki tabata e cruzada pa Monica Kock caminda e tabatin e chens pa cana un otro caminda of sigui bay riba e mesun. Na e momento ey el a pensa kico e kier como persona y e biaha aki el a elegi di coy e otro caminda.

Monica Kock ta considera tambe cu su retiro como lider lo duna e hendenan di MPA oportunidad, nan tin como partido analiza, bay bek den seno y wak con nan ta bay tuma e pasonan awor. Nan lo tuma si nan tempo pa yeg ana un decision di con e partido lo sigui bay, pero Monica Kock ta kere cu e habilidad



y capacidad tey den e personanan cu ta riba e lista di MPA. Pesey e ta kere cu e partido lo sigui caminda cu hunto nan lo carga esey.

Tambe Monica Kock ta bisa cu mirando cu falta casi 4 año pa eleccion atrobe, e momento tabata esun indica pa e tuma su retiro y duna asina e partido e oportunidad pa 'regroup' y pa un otro hende lanta para y carga e partido.